

# Cosmographie Vniuerselle

retourner. Si ie voulois icy particulariser tous les Promontoires, riuieres, & façons de viure de ce peuple selon, il n'en faudroit faire vn iuste volume, qui seroit de peu de profit au lecteur, à cause que ce peuple Barbare, tirant tousiours de la part de nostre Pole Arctique, n'est pas mieux civilisé & courtois, que sont les Canadiés & leurs voisins: Toutesfois pour ne me monstret ingrat aux pilotes & ieunes mariniers qui voyagent en ce grand Ocean, i'ay bien voulu leur remarquer les principales riuieres, goulfes, caps où Promontoires, qui sont compris depuis le destroit de Magelan, iusques aux Isles de terre neuue qui nous auisinent d'assez pres: obseruât les longitudes, latitudes des degrez, & distance d'un lieu à l'autre, à fin qu'ils ayent de quoy se contenter. Or en premier lieu se trouue en ceste terre Australe, la Baye de Bonauenture ou destroit de la Victoire, à trois cens huit degrez de longitude, cinquante deux degrez trente minutes de latitude: & pres d'iceluy se presente le cap des vnze mille Vierges, en mesme esleuatiō, & ioignant lequel y a vne belle Isle. De là se voit le Port saint Iulien, ainsi nommé d'autant qu'il fut decouvert le iour de ce saint, distant dudit Cap, de septante trois lieues & demye, & a trois cens seize degrez de longitude, minute nulle, & cinquante de latitude minute nulle. A vingt cinq lieues de là se trouue la Baie de Cranne gisant à trois cens dix huit degrez de longitude minute nulle, & quarante neuf de latitude minute nulle: au deuant de laquelle se voyent les Isles de saint Coin. Quant au cap Blanc, tirant tousiours la part du Tropique de Capricorne, il est esloigné de Cranne de cinquante lieues, posé sur les trois cens vingt degrez de longitude, & quarante sept degrez trente deux minutes de latitude: & qui est pres de celuy de saint Dominique de douze lieues & demye, où enuiron, lequel gist à trois cens vingt trois degrez de longitude, & quarante six degrez de latitude. A quarante lieues duquel se presente la Baye ditte de saint François, pour autāt que à pareil iour elle fut aussi decouuerte: & est à trois cens vingt quatre degrez de longitude, & a quarante trois degrez de latitude minute nulle. De là vous venez à la Basse Anegade, qui fait vn goulfe, dans lequel est vne Isle peuplee de ces grands hommes desquels ie vous ay ailleurs discouru: & gist sur les trois cens vingt sept degrez de longitude, & sur les trente huit de latitude, distante de celle de saint François, de septante cinq lieues. De ce lieu iusques à la pointe sainte Helaine, y a cent quatre lieues, & gist à trois cens vingt neuf degrez de longitude, & a quarante six degrez vingt & huit minutes de latitude. Le cap Blanc luy est esloigné de dix lieues, gisant à trois cens trente degrez de longitude, & a quarante cinq degrez quarante minutes de latitude. Quāt à l'emboucheure de la riuiere de Plate, qui peut auoir quelques vingt lieues d'ouverture, sa coste est dangereuse, à cause des sablons & battures: & est en mesme esleuation que le Cap susdit. A vingt lieues de là se trouue le Cap de sainte Marie, qui gist sur les trois cens trente & vng degrez trente minutes de longitude, & trente cinq degrez trente minutes de latitude: & Tibiguire qui luy est esloigné de quarante trois lieues, gist à trois cens vingt & deux degrez trente minutes de longitude, trente vng degrez trente minutes de latitude. Estant en ceste hauteur il faut faire largue en pleine mer, à fin que les vents ne vous accueillent: puis venez au port de Rostringue, distant de Tibiguire de septante cinq lieues, posé sur les trois cens trente cinq degrez de longitude, vingt & huit degrez trente minutes de latitude. En cest endroit sont posees les Isles de Ferrailles, peuprees d'hommes felons & cruels, qui ne se peuent adouscir pour quelque present qu'on leur face. A dix lieues de là, se trouue le port de Paste, à trois cens trente cinq degrez de longitude, vingt & huit degrez quinze minutes de latitude, au deuant & entree duquel y a plusieurs

Port de saint Iulien, pour quoy ainsi nommé.

Riuiere de Plate et son embouchure.

Port de Paste.